

中國方志叢書·華北地方·第二三六號

據

清·劉懋官修周斯億纂
清·宣統三年鉛印本

影印

陝西 省

涇陽縣志
(二)

成文出版社有限公司印行

重修涇陽縣志卷十二

列傳

官師

漢

王立建始中爲池陽獄掾時薛宣爲左馮翊池陽令舉立廉吏府未及召立受囚家錢宣責讓縣縣案驗獄掾迺其妻獨受繫者錢萬六千受之再宿獄掾實不知掾繫慙恐自殺宣聞之移書池陽曰縣所舉廉吏獄掾王立家私受賕而立不知殺身以自明立誠廉士甚可憫惜其以府決曹掾書立之柩以顯其魂

周緹沛人常爲高祖參乘以舍人從起沛至灞上西入蜀漢

還定三秦食邑池陽軍之東也乍利乍不利終無離上心遂以爲信成侯已又封蒯成侯

兒寬千乘人也武帝元鼎閒爲中大夫遷左內史治民有惠政民大信愛之因表奏開六輔渠定水令以廣溉田歷御史大夫

趙中大夫白公武帝太始二年爲中大夫奏鄭渠北復穿渠溉田名曰白渠至今利賴焉

王吉字子陽瑯琊臯虞人也少好學明經以郡吏舉孝廉爲郎補若盧右丞遷雲陽令舉賢良爲昌邑王中尉數諫正王及王之入繼而旋以淫亂廢也諸昌邑舊臣皆坐法誅吉以嘗諫正故減城旦後起家爲益州刺史徵爲博士諫大夫以

上言不聽謝病歸吉與貢禹爲友世稱王陽在位貢禹彈冠
言其取舍同也

並史失其姓元帝時爲池陽令素行貪污會野王爲左馮翊
並輕其外戚年少治行不改野王乃案驗置之法

朱博字子元杜陵人也初爲縣亭長歷安陵丞成帝朝王鳳
秉政長史陳咸薦博除幕府屬鳳奇之舉博櫟陽令徙雲陽
又徙平陵以高第入爲長安令官至丞相封陽鄉侯

晉

杜軫字超宗成都人也爲池陽令治爲雍州諸邑最百姓立
祠祀之入名宦

隋

房彥謙字孝冲清河人大業中爲司隸刺史時隋政漸亂朝紳靡然而彥謙介直孤立執政者嫉之出爲涇陽令居官所得俸祿皆以周恤親友家無餘財車服器用務存素儉雖至屢空怡然自得常從容獨笑顧謂其子玄齡曰人皆因祿富我獨以官貧所遺子孫在於清白耳未幾卒於官彥謙爲人廉介又善草隸得其尺牘者皆寶翫之唐興以子玄齡故追贈徐州都督臨淄縣公

唐

萬齊融開元閒爲涇陽令與賀知章輩及僧曇一爲儒釋之遊

韋滌德宗時爲縣令詔曰涇陽令潔己亮直處事通敏一道

之內獨無怨言可僉工部員外郎祀名宦

韋紳卿未詳何時人爲縣令邑中豪家爲水碾侵渠水令皆破之利民田萬餘頃祀名宦

李行言宣宗時爲縣令上遊獵於苑北遇樵夫問其縣曰涇陽人也令爲誰曰李行言爲政何如曰性執有強盜數十人匿軍家索之不與盡殺之上歸貼其名於寢殿之柱冬十月行言除海州刺史入謝上錫金紫問曰卿知所以衣紫乎對曰不知上取殿柱帖示之祀名宦

朱勃爲雲陽令按後漢書光武時有朱勃扶風茂陵人爲渭城宰舊志乃謂唐時令又不言何處人豈漢朱勃嘗令涇陽舊志誤以爲唐官抑唐時又別有朱勃也不可考

韓臯字仲聞長安人資質重厚有大臣器德宗時爲雲陽尉策賢良方正異等拜右拾遺歷官吏部尙書穆宗時加右僕射大抵以簡爲治所至有績

長孫祥永徽閒爲雍州長史時鄭白渠以多碾磴耗竭水利祥上言因命祥行縣毀之

李元紘開元閒爲京兆少尹毀白渠傍水磴之瀦遏爭利者蓋唐時京兆少尹專督視涇上渠堰云

李栖筠廣德閒爲戶部侍郎時白渠上多寺觀碾磴耗水栖筠奏拆之以廣水利

郭子儀華州鄭人以武舉異等初補左衛長史當安祿山之亂討賊屢有功遂平河北復京師收東都歷進副元帥封汾

陽王數以毀罷會僕固懷恩陰召回紇並吐蕃入寇犯奉天武功詔起子儀率萬人屯涇陽時回紇謂子儀已死因怪問之曰郭令公誠存我得見乎子儀謂其左右曰回衆數十倍難以力敵吾將出示以至誠左右諫不聽請以五百騎從亦不聽即以數十騎出免胄見其回長曰諸君同艱難久矣何忍忘忠誼而至是回紇棄兵下馬拜曰果吾父也子儀卽召與飲誓好如初因謂曰彼吐蕃本吾舅甥國無負而來棄親也其馬牛被數百里公等若倒戈乘之如拾芥此天錫不可失也遂戎得利與我繼好不兩善乎衆許諾俟吐蕃引去遂以兵合回紇追躡之破其衆十萬靈臺西原已而吐蕃寇涇州子儀復屯涇陽邀戰靈州敗之厯攝冢宰號尙父進中書

令祀名宦

宋

何承裕晉天福末擢進士第有清才好爲歌詩而嗜酒狂逸
初爲都中主簿累官至著作佐郎直史館出爲盩厔咸陽二
縣令爲治清而不煩民頗安焉每覽牒訴必戲判以喻曲直
訴者多心服引去往往召豪吏接坐引滿吏因醉私白事承
裕悟之笑曰此見罔也當受杖杖訖復召與飲其無檢多類
此開寶三年自涇陽令入爲監察御史後歷侍御史累知忠
萬商三州太平興國中卒

范育字巽之邠州三水人神宗朝進士爲涇陽令尋以養親
謁歸從張橫渠氏學起家歷官戶部侍郎嘗請上用誠意正

心爲治有爭棄質孤勝如兩堡及城李諾平汝遮川等議時以爲重

侯可字無可華陰人初孫沔征儂獠請參軍事以功歷簽書儀州判官韓琦之鎮長安也薦知涇陽縣嘗說渭源羗輸地八千頃因城熟羊以撫之琦上其功又議增鑿白渠得召對旋以微罪罷官至殿中丞可輕財樂義有卓行

王康朝字公起河南人大觀初爲雲陽宰宣和閒承節郎兼孟店鎮酒稅楊葆光於所題法相寺壁閒詩跋之康朝蓋宋之名人云

周良孺爲都水丞議自石門開渠引涇水至三限口以廣白渠溉田之利詔從之

穆京大觀閒爲主客員外郎上言開豐利渠上卽命京視役
且撫問官屬給賜工師緡錢渠成至今賴之

宋彥通宣和閒爲縣令政不苛民亦不擾

金

盧安撫史逸其名初金國於仲山之巔前臨涇水處爲山寨
屯兵其上置安撫司以主其事金末爲安撫者盧也壬辰元
兵收陝西盧與妻子俱投涇水而死時人哀之

王浩以吏辟爲涇陽令廉白爲關輔第一時西臺督州縣植
棗甚急浩獨無所問所司將罪之浩曰是縣所植已滿其數
若欲增之必盜他人所有取彼置此未見其利也其愛民多
此類

元

伯顏帖木兒大德閒爲屯田府總管兼司河渠時涇渠利微帖木兒爲疏導之水乃如故

別帖木兒京師人至治閒以拱衛直都指揮使宣差屯田府事兼司河渠大定初修洪渠帖木兒督之水利倍常

宋秉亮至正閒爲陝西諸道行御史臺監察御史行部至縣親閱鄭白等渠因建言興壞之方甚辨

王琚字仲瑗濟南鄒平人大德閒爲縣令與伯顏帖木兒共疏涇渠後遷陝西諸道行御史臺監察御史上言於豐利渠上更開石渠渠成民賴之

明

耿秉文洪武初以長興侯鎮守陝西修築洪渠堰又浚渠十萬三千餘丈民咸利之祀名宦

項忠成化初爲陝西巡撫副都御史請自舊渠上開鑿石山一里餘引谷口上流入渠名曰廣惠渠

余子俊成化閒爲陝西巡撫右都御史經略渠堰於大龍山鑿五竅以取明疏其渠之曲折淺狹者

阮勤成化閒爲陝西巡撫副都御史發帑募工築修渠堰鑿石引涇入渠溉五縣田八千餘頃

劉端成化閒爲西安府同知明曉水利委心民事修渠人被其澤旣去民追思之

沈子章萬歷末爲邠乾兵巡道親歷涇渠察其利病督夫疏

濬更於洪口設立水夫伺防壅漏以爲久遠之謀民獲其利焉

俞思義四川新繁人洪武中以人材任爲政廉勤和緩民追思之

曾玉字士潔四川涪州人正統末任臨政嚴謹然有惠愛深得民心任滿保留在任前後二十餘年政績澤民者不能盡述修城其一云

龐輔山西寧鄉人成化初以舉人任持身端謹事上不阿民安其政

暢亨山西河津人進士弘治初以監察御史左遷涇陽知縣剛方明決民心悅服未及期邑以大治增開冶水利渠民爲

立祠祀之入名宦

劉湜河南太康人弘治閒以進士任剛斷持正毀境內諸淫祠幾盡繕學宮增修內外學廬生儒德之

宋鑑河南鞏縣人弘治閒以舉人任政尙寬和然不可犯任九年民無怨者

劉仲和山西臨縣人正德初以舉人任明達疏爽百姓畏而愛之

李溥正德閒以舉人任剛毅有力不黷貨蓋令之良者

霍鵬山西太原府人嘉靖閒以進士任爲人豪放遇事立辦雄飲喜吟自守無訾

連應魁河南武安人嘉靖閒以監生任重刊李侍御錦涇陽

志並續刻拾遺二卷附後

蕭汝芳字豐源遼東鐵嶺衛人萬歷閒以進士任剛直尙風
裁陞主事與傅公同祠

傅好禮北直固安人萬歷初以進士任愛民禮士有古循吏
風更勤修葺官署文廟學宮一時改觀延邑人魏恭襄作縣
志民立祠祀焉

張邦政號平寰北直滿城人萬歷閒以進士任廉潔自矢然
性稍急

王之鑰河南洛陽人萬歷閒以進士任高自標植長史之有
丰稜者祀名宦

馬之服號松蘿河南夏邑人萬歷閒以進士任真切愛民而

用法以嚴

甯之翰字林閣山西聞喜人萬歷閒以進士任精察勤敏兼有子惠聲與傳蕭二公同祠

袁化中字熙字山東武定州人萬歷閒以進士任愷悌樂易接士民若家人父子古召杜之流也百姓祠祀之入名宦張紹先字重光北直鉅鹿人萬歷閒以進士任洞達機宜事無留滯

苗思順字聚百河南寧陵人萬歷末以進士任治不擾民能課士尤長於詞翰詩歌

路振飛字皓月北直曲周人天啟末以進士任性清介更嫻吏事崇禎二年寇亂從容指畫邑中賴以安堵祀名宦